



Sonda passada è gia li a Lantsch la premiera digl teater agl liber «1524», chegl an preschientscha da varsaquantas politicras e politichers. An acziun sen la foto èn Marc Jubete ainten la rolla da Gian Travers e Yaiza Coll tgi gioia la sia donna Anna Travers.

FOTO MATTIAS NUTT

500 onns Grischun – gronda festa a Lantsch

La regenza grischuna è festivo igl 500avel anniversari digl Grischun: An preschientscha da passa 200 persungas è gia li sonda passada a Lantsch la premiera digl gi agl liber «1524». Suandadas all'invitaziun digl cantun èn la cunsigliera federala Elisabeth Baume-Schneider scu er ulteriours/as politichers/as digls cantuns vischinants e digl exterior.

SANDRA BALZER/FMR

«Es ist genug für mich» – cun chels plets ed en surreir è la cunsigliera federala *Elisabeth Baume-Schneider* procuru per en'amprema risada sen la tribuna agl liber a Lantsch. Chegl siva da chegl tgi ella veva benevento per rumantsch la raspada da nom e da pom politic: «Id es üna gronda onur da pudair discuorrer a vus a quista festa d'anniversari istorica dal Grischun.»

Grond prominenz a Lantsch

Passa 200 persungas èn suandadas sonda all'invitaziun digl cantun Grischun ed èn sa randeidas sen la planeira ota a Lantsch, la pastgira sotvart la vischnanca an vischinanza dalla baselgia viglia Sontga Maria. La raschung per chel de da festa è stada igl punct culminont dallas festivitads da 500 onns Stadi liber dallas Treis Leias: La premiera digl gi agl liber «1524» (la FMR è rapporto igls 12 da settember 2024). Hospitanta dall'occurrentza da giubileum è stada la regenza grischuna tg'ò alloura er gist all'antrada dalla marcanta tribuna da lenn benevento la cunsigliera federala scu er politicras e politichers da nov cantuns, digl exterior vischinant (Vorarlberg, Sondrio e Lombardia) e represchentants e represchda varsaquantas instituziuns grischunas.


Oz avant 500 onns

Precis oz avant 500 onns, numnadaint igls 23 da settember 1524, èn las Treis Leias – la Lia Grischa, la Lia da la Chadé e la Lia da las Diesch Dretgiras – s'üneidas agl stadi liber ed on sottascrèt la perdetga da chel evenimaint: la Brev d'allianza (Bundsbrief). Or da chesta fusiun è resulto igl cantun Grischun.

Igl gi agl liber «1524» rachinta da chella fundaziun, digls decennis avant e siva, digl paeis e dalla veta digls carstgangs tg'eran exposts allas ambiziuns da pussanza da singuls «gronds signours». El rachinta da carstgangs tgi cumbattan per libertad ed autonomia. *Giovanni Netzer* – igl intendand dad Origen – segna scu autour, reschissour e creader dalla culissa da chel gi.

Cumparaglea Giura e Grischun

Cugl sies pled festiv a Lantsch è la cunsigliera federala Elisabeth Baume-Schneider cumparaglea la fundaziun digl cantun Grischun cun chella digl Giura, sies cantun d'origin. Er schi igl Stadi liber dallas Treis Leias seia sto en act



Alex Vazquez Gala ainten la rolla digl duca da Milang.

FOTO BENJAMIN HOFER

creativ digl taimp medieval tardeiv e chel digl cantun Giura en «unfant dall'istorgia giova». «Pero ensatge colliescha chels dus cass: Tar la fundaziun èn els stos accompagneas da considerablas tensiuns socialas e politicras», è detg la cunsigliera federala sen la tribuna a Lantsch cun vista vers igl Pass digl Gelgia. I seia gartagea da far diever da chellas tensiuns scu forza politica e da crear ena dinamica tgi «ò tschif e moderniso l'antiera societad». Sch'ins cumparaglea chegl cun igl taimp dad oz, noua tgi gio fusiuns da vischnancas procuran per grondas debattas, dervan las istorgias digl cantun Grischun e Giura igl spazi da chegl tgi seia politicamaintg pussebel. Ed i seia «ancuraschond da saveir, tg'igl è pussebel dad uneir antieras valadas, gea antieras regiuns», è detg Elisabeth Baume-Schneider.

Parolini dat ena lecziun d'istorgia

«Nöbels, Sabbis, Hundraivels Signours et Wschins dallas Vschinaunchias!», è benevento *Jon Domenic Parolini* la raspada. Igl president dalla regenza grischuna è randia attent, tgi digl taimp digl stadi liber ins vess prubabel benevento uscheia igls preschaints tar en'occurrentza cumparabla cun chella da chesta sonda a Lantsch. Aint igl sies pled festiv è igl cunsigliier guvernativ mess la fusiun an context istoric. «Igl è scu ena lecziun d'istorgia tgi suonda», è detg Jon Domenic Parolini.

Cun sa drizzar agls preschaints digls cantuns vischinants è el rachinto digl onn 1701, cura tg'igl stadi liber fiss gugent davanto commemor cumplang dalla Confederaziun. Tar igls

confederos da lez taimp vegia igl Grischun dei valia scu «aint igl migler cass ena anarchia organisada». Chegl perche gl tgi dus terzs digl stadi liber era da lez taimp refurmo.

Aint igl sies pled è igl president dalla regenza grischuna alloura er sa drizzo agls cumegn digl cantun. «En agratzgamaint spezial pertotga tot igls cumegn dalla Regiun Alvra per lour grond sustign finanziar ed organisatoric pigl gi liber.»

En gi «senza parole»

Sot la moderaziun da *Claudio Spescha* è igl autour digl gi, Giovanni Netzer, introduia igls giasts aint igl teater agl liber «1524», avant tgi chels on alloura pudia galdeir la premiera davant ena culissa unica amez la Val Alvra. En gi «senza parole» è igl moderatur

numno sonda seira a Lantsch igl teater noua tgi diesch saltunzas e saltunzs professiunals scu er 21 giuvenils laics digl Grischun gian sainza plets. «Igl muvimaint è igl lungatg igl pi uriund digl carstgang», è introduia Giovanni Netzer igls 200 preschaints.

L'unica excepziun èn texts tgi vignan preligias aint igl gi e tgi sa basan sen la figura da Gian Travers (1483 – 1563). Ena persunga ancunaschainta aint igl ravogl rumantsch: Cun sia canzung «Chanzun da la guerra dalg Chiastè d'Müs» è el stgaffia igl pi vigl text cumprovo dalla litteratura rumantscha. «El è via da lez taimp tge tg'è capito», è declaro Giovanni Netzer la figura principala aint igl sies teater. Gian Travers seia stada ena persunga tgi vegia vivia ainten en process e tgi seia sto da lez taimp dapertot dalla parteida.

Gian Travers tgamina tras l'istorgia

Chegl è alloura er sa musso aint igl gi liber da sonda seira durant la darandeida: Gian Travers (giuia da *Marc Jubete*) tgamina tras l'istorgia e daclera igl taimp. El sa regorda agls evenimaints da sia veta. Sper el cumparan e soltan er imperatours, ducas, patrizians, guerriers ed abitants/as. Fatg on igls actours ed actours chegl a moda expressiva, accompagneas da musica. E chegl betg angal sen la tribuna da lenn tgi represchainta ena tgesa da cartas filigrana, mabagn anturn ed anturn sen las pastgiras da Lantsch.

Ulteriours preschentaziuns digl gi liber «1524» on li igls 27, 28 e 29 da settember 2024 ed igls 4, 5, 11 e 12 d'otgover 2024, mintgamai allas 18.30. Reservaziuns e bigliets dattigl sen origen.ch.